

**BOSNA I HERCEGOVINA**  
**TUŽILAŠTVO BIH**  
**GOVOR ZA KONFERENCIJU ZA MEDIJE**  
**29.11.2007. godine**

**Dame i gospodo, cijenjeni predstavnici medija.**

Prije svega, želim Vas sve pozdraviti u ime Odjela za ratne zločine Tužilaštva BiH, kao i u svoje lično ime.

Ovom prilikom želim reći da mi predstavlja izrazitu čast što me je Visoko sudsko i tužilačko vijeće imenovalo na poziciju zamjenika glavnog tužioca, te da mi je čast što ću sa svojim kolegama u budućem periodu raditi u ovom odjelu.

Vjerujem da Vam je poznato da Odjel za ratne zločine Tužilaštva Bosne i Hercegovine počeo sa radom u martu 2005. godine, dakle prije nešto više od 2 i po godine. Od 01.03.2007. godine, Odjel za ratne zločine postoji u sadašnjim kapacitetima, tj. ima 18 tužilaca i najbrojniji je Odjel u Tužilaštvu BiH.

U proteklom periodu u ovom Odjelu ulagani su veliki naponi jer se istovremeno vršilo popunjavanje kapaciteta Odjela sa ljudskim i tehničkim resursima, a istovremeno se vodile istrage istrage, podizale optužnice i predmeti zastupali u sudnicama.

Odjel za ratne zločine, prilikom početnih planova za njegovo uspostavljanje, bio zamišljen samo kao Odjel u kojem će se raditi predmeti koji neće moći biti procesuirani zbog izlazne strategije Haškog tribunala i morat će iz Haaga biti prebačeni u BiH, međutim, i domaće vlasti i međunarodna zajednica, shvatili su da će ovaj Odjel imati mnogo veću ulogu.

U Odjelu za ratne zločine Tužilaštva BiH u proteklom periodu za samo 2 i po godine podignuto je 40 optužnica protiv 69 lica, samo tokom 2006.g. saslušano je oko 800 svjedoka, a trenutno su u Odjelu za ratne zločine aktivne istrage u 312 predmeta protiv 894 osobe.

Izneseni podaci pokazuju na čvrstu opredjeljenost Tužilaštva BiH da sa svojim kapacitetima procesuiraju što je moguće više predmeta ratnih zločina.

Od svog osnivanja i početka rada u martu 2005. godine, Odjel za ratne zločine je u stalnom fokusu pažnje javnosti i mi to razumijemo.

Mi u Odjelu za ratne zločine razumijemo populacije porodica žrtava i udruženja žrtava ali javnost u Bosni i Hercegovini treba i mora znati da su u periodu od 1992. godine pa do

01.03.2005. godine, dakle u periodu od 13 godina predmeti ratnih zločina u Bosni i Hercegovini bili procesuirani na entitetskom nivou.

Zbog toga odgovore na pitanja zbog čega neki predmeti nisu procesuirani po 10 i više godina prije svega treba tražiti od entitetskog pravosuđa.

U Bosni i Hercegovini, prema posljednjim podacima prikupljenim iz svih tužilaštava, postoji oko 16150 lica koja su prijavljena kao potencijalni počinioci ratnih zločina.

Ja znam da zadatak tužioca nije lak i da on nailazi na poteškoće svake vrste: birokratske, finansijske, političke, itd. Svakako, lako je kritikovati spolja, ali ipak kritika treba da bude objektivna, kako uvijek ne bi bila pogubna, kako bi mogla biti korisna, kako bi tužiocu pružila mogućnost da u svom daljnjem radu postigne što bolje rezultate. Ovu misao je izrekla jedna vaša koleginica, pa sam je citirao, a pošto ste vi informisani znate o kome je riječ.

Broj osoba prijavljenih da su počinile ratni zločin izuzetno je veliki u odnosu na mali broj pravosudnih dužnosnika koji rade na ovim predmetima u cijeloj Bosni i Hercegovini, kako u tužilaštvima, tako i u sudovima i policiji, naročito na nivou entiteta.

Svjestan sam da pred mojim kolegama i predamnom predstoji veliki posao i rad na velikom broju predmeta ratnih zločina, kako bi se krivičnim procesuiranjem počinitelja ratnih zločina donijela kazna za krivce, pravda za žrtve i mir i uslovi za suživot budućih naraštaja.

U Odjelu za ratne zločine čvrsto smo opredjeljeni za intenzivan rad na predmetima ratnih zločina, te vas uvjeravam da ćemo i u budućnosti davati najveće moguće rezultate, koji se mogu dati od sadašnjeg broja tužilaca i ostalog osoblja u Odjelu.

U Odjelu za ratne zločine, problemu postojanja velikog broja prijavljenih osoba i velikog broja predmeta ratnih zločina u cijeloj BiH pristupamo krajnje ozbiljno i Tužilaštvo BiH je jedan od inicijatora ideje izrade Državne strategije za rad na predmetima ratnih zločina.

Ministarstvo pravde BiH osnovalo je Radnu grupu za izradu državne strategije za rad na predmetima ratnih zločina, i iskreno se nadamo da će usvajanje ove Strategije i njena implementacija u BiH obezbjediti dovoljan broj tužilaca, sudaca i policijskih službenika za rad na predmetima ratnih zločina, kao i potrebne tehničke kapacitete.

Očekujemo da će strategija dati kvalitetna rješenja za efikasniji rad na predmetima ratnih zločina i da će se uspostaviti odjeli i odsjeci za rad na predmetima ratnih zločina u policiji, tužiteljstvima i sudovima, kako na razini entiteta, tako i na državnoj razini.

Također se nadamo da će strategija donijeti rješenje kojim će se omogućiti da se svi predmeti ratnih zločina koji se procesuiraju u BiH procesuiraju na osnovu Zakona o krivičnom postupku BiH i Krivičnog zakona BiH.

Na ovaj način u BiH će se stvoriti logistički okvir za rješavanje velikog broja predmeta ratnih zločina.

Hvala vam.